

TAUNET

I Eng' taunet, ko kitoi Kiptaiyat koyai kipsengwetisiek ak ng'ony. 2 Ak kimagomi kiy ng'ony ak kimagotinyei iton; ak kimi mesundeito baragutab riret; kiwendote Tamirmirietab Kiptaiyat baragutab beek. 3 Ak kimwa Kiptaiyat kole, Ingo-lapkeit; kolapkeit. 4 Kigeer anyun Kiptaiyat lapkeiyet, kole mie: ak kiibesio Kiptaiyat lapkeiyet ak mesundeito. 5 Kiguure Kiptaiyat lapkeiyet Bet, ak kiguure mesundeito Kemoi, ak kiek koskoleny ak kiek karon, betut agenge.

6 Kimwa Kiptaiyat kole, Ingobiit soet eng' kwenutab beek, si kobesio beek chu ak beek chun. 7 Ak kiyai Kiptaiyat soet, ak kiibesio beek che mi kureretab soet ak che mi baragutab soet, ak kiyaak kou noto. 8 Kiguure Kiptaiyat soet Kipsengwet, ak kiek koskoleny ak kiek karon, betut ne bo aeng'.

9 Ak kimwa Kiptaiyat kole, Ingoyumjigei beek yeto agenge che mi kureretab kipsengwetisiek, ak ingotok emet ne mami beek; ak kiyaak kou noto. 10 Ak kiguure Kiptaiyat emet ne mami beek Ng'ony; ak kiguure beek che kagoyumgei Nyanjosiek: ak kigeer anyun Kiptaiyat kole mie. 11 Ak kimwa Kiptaiyat kole, Ingobityo suswek eng' ng'ony, ketik alak tugul che mengechen che bo timin, che iyei keswek, ak ketik che bo logoek che iyei logoek kou kergeindanywa che tinyei keswekwak eng' orinywa eng' ng'ony; ak kiyaak kou noto. 12 Kibityo anyun suswek eng' ng'ony, ketik alak tugul che mengechen che bo timin che iyei keswek kou kergeindanywa, ak ketik che iyei logoek, che tinyei keswekwak, eng' orinywa kou kergeindanywa, ak kigeer Kiptaiyat kole mie. 13 Ak kiek koskoleny ak kiek karon, betut ne bo somok.

14 Ak kimwa Kiptaiyat kole, Ingobiit tuguk che iluu eng' soetab kipsengwetisiek si kobiit kobesio bet ak kemoi; si koek choto kaborunaik, che bo arawek, ak betusiek ak kenysisiek; 15 Ingoek choto che iluu eng' soetab kipsengwetisiek si kobiit koluuchi ng'ony: ak kiyaak kou noto. 16 Kiyai Kiptaiyat tuguk che iluu aeng' che eechen; si kobiit koboi ne o bet, ak koboi kemoi ne ming'in, koboto kecheik. 17 Kiinde Kiptaiyat choto

soetab kipsengwetisiek si kobiit koluuchi ng'ony, 18 Si koboi bet ak kemoi, kobesio lapkeiyet ak mesundeito, ak kigeer Kiptaiyat kole mie. 19 Ak kiek koskoleny ak kiek karon betut ne bo ang'wan.

20 Ak kimwa Kiptaiyat kole, Ingochang'a koek ng'isiat tuguk che soptos eng' beek, ingotirirensa taritik eng' baragutab ng'ony eng' soetab kipsengwetisiek. 21 Ak kitoi Kiptaiyat koyai niirenik che eechen, ak kiy age tugul ne sobei, ne wendote beek, eng' chang'indo, kou kergeindanywa, ak tarit age tugul kou kergeindanyi, ak kigeer Kiptaiyat kole mie. 22 Kiiberur Kiptaiyat ichek, kolenji, Oiiye, otesage, onyi beekab nyanjosiek, ak ingotesogis taritik eng' ng'ony. 23 Ak kiek koskoleny ak kiek karon, betut ne bo mut.

24 Kimwa Kiptaiyat kole, Ingoii ng'ony tuguk che soptos kou kergeindanywa, tuga, ak che ichutegei, ak tiong'ik che bo ng'ony kou kergeindanywa, ak kiyaaak kou noto. 25 Ak kiyai Kiptaiyat tiong'ik che bo ng'ony kou kergeindanywa, ak tuga kou kergeindanywa; ak tuguk tugul che ichutegei eng' ng'ony kou kergeindanywa: ak kigeer Kiptaiyat kole mie. 26 Kimwa Kiptaiyat kole, Ongeyai chito eng' itondanyo, kou kergeindanyo: ak ingoboi ichek njirenik che mi nyanjosiek, ak taritik che mi soet, ak tuga, ak che mi ng'ony komugul, ak tiong'ik tugul che ichutegei ng'ony. 27 Kitoi anyun Kiptaiyat koyai chito eng' itondanyi, kitoi koyai chito eng' itondab Kiptaiyat; kitoi koyai muren ak tie. 28 Ak kiiberur Kiptaiyat ichek; ak kilenji Kiptaiyat ichek, Oiiye, otesage, si onyi ng'ony; ak obou; ak olaitorane njirenik che bo nyanjosiek, ak taritik che bo soet, ak kiy age tugul ne sobei ne wendote ng'ony. 29 Ak kimwa Kiptaiyat kole, Ogeero, kaagonok ketik alak tugul che mengechen che bo timin che tinyei keswek che mi baragutab ng'ony, ak ket age tugul ne tinyei logoekyik keswek, koek amitwogikwok. 30 Kaagochi anyun ketik alak tugul che mengechen che nyalilen koek amitwogikab tiony age tugul ne bo ng'ony; ak tarit age tugul ne bo soet, ak kiy age tugul ne ichutegei ng'ony ne tinyei kabusetab sobondo; ak kiyaaak kou noto. 31 Ak kigeer Kiptaiyat tuguk tugul che kigagoyai kole miachen mising' inne. Ak kiek koskoleny ak kiek karon, betut ne bo lo.

2 Kiiges anyun yaetab kipsengwetisiek ak ng'ony ak chang'indanywa tugul. 2 Kiiges Kiptaiyat boisionikyik che kigagoyai

eng' betut ne bo tisab; ak kiimuny eng' betut ne bo tisab eng' boisionikyik tugul che kigagoyai. 3 Ak kiiberur Kiptaiyat betutab tisab, kotaban: amu kiimuny eng' betunoto eng' boisionikyik tugul che kitoi Kiptaiyat koyai.

4 Chu taunaik che bo kipsengwetisiek ak ng'ony eng' betunoto ne kiyae Jehovah Kiptaiyat kipsengwetisiek ak ng'ony. 5 Kitomo kobiit ket ne bo kewet eng' ng'ony, ak kitomo kobityo ketik alak tugul che mengechen che bo kewet: amu kitomo kogochi Jehovah Kiptaiyat korobonji ng'ony' ak kimagomi chi ne ibati ng'ony. 6 Ago kitogosta kibungweret eng' ng'ony; ak kirobonji ng'ony komugul. 7 Ak kiyai Jehovah Kiptaiyat chito eng' ng'ung'unyek, ak kobusyi serunekyik kabuset ne bo sobondo; kiek, anyun, chichoto, chito ne sobei. 8 Kigol Jehovah Kiptaiyat mbaret eng' Eden eng' komostab kong'asis, ak konde oloto chichoto kigagoyai. 9 Ak kiigochi Jehovah Kiptaiyat kobit ket age tugul eng' ng'ony ne kararan eng' keeret, ak ne mie eng' amet; ak ketit ne bo sobondo eng' kwenutab mbaret, ak ketit ne bo naet ne kinae ne mie ak ne ya. 10 Ak kimong'une Eden ainet ne ibisi mbaret; yeitio kopcheigei eng' oloto, koek ainosiek ang'wan. 11 Kainetab ne bo tai ko Pison: noto ne yemei emet komugul ne bo Abila ole mi tahabu; 12 miachen tahabu che bo emonoto: mitei bedola ak soam. 13 Kiguure ainet ne bo aeng' Gion: noto ne yemei emet komugul ne bo Kus. 14 Kiguure ainet ne bo somok Hidikel; noto ne wendi komostab kong'asis ne bo Asiria. Kiguure ainet ne bo ang'wan Euprate. 15 Kiimut Jehovah Kiptaiyat chito kwo kotebe mbaretab Eden si kobiit kosemberi ak koribei. 16 King'at Jehovah Kiptaiyat chichoto, kolenji, Imuchi iam logoek che bo ket age tugul ne imache ne mi mbaret; 17 ago amat iam che bo ketit ne bo naet ne kinae ne mie ak ne ya; amu eng' betut ne keam che bo ketoto, imee ne matiny.

18 Kimwa Jehovah Kiptaiyat kole, Mamie kotebi chi inegei; ayachini ne toreti ne kergei ak inendet. 19 Kiyai anyun Jehovah Kiptaiyat tiony age tugul ne bo ng'ony eng' ng'ung'unyek, ak tarit age tugul ne bo soet, ak kokwerichi chichoto tiong'ichoto

2: 12 *bedola* manget ne u mwaita ne sengelel; ng'uu ne anyiny, ne bunu ketit ne bitei eng' emotinwekab kong'asis.

soam koik che bichien eng' alyet, che nyalilen, che kinyorjin emetab Abila.

2: 14 *Hidikel* kainet age ko Tigris.

kogeer ole tochindoi kainaik; ak kainet ne kiguure chichoto kiy age tugul ne sobei eng' choto, ko kiek kainennyi noto. 20 Ak kitochi chichoto tuga tugul kainaik, ak taritik che bo soet, ak tiony age tugul ne bo ng'ony; ago kimabiit ne toreti chichoto ne kergei ak inendet. 21 Kiigochi anyun Jehovah Kiptaiyat chichoto ruondo ne nyigis, konuch: ak konem karasta agenge, ak kotuge yoto panyek kogeere karasata: 22 Ak kiyai Jehovah Kiptaiyat karasata kiinemune chichoto, koek kwondo; ak komutyi chichoto. 23 Ak komwa chichoto kole, Ni anyun nguno ko kowet ne bo kowekyuk, ak panyek che bo panyekab bortanyu: kiguure kainennyi Kwondo, amu kaginemune Muren. 24 Amu noto anyun, metoi mureno kwandanyi ak kamennyi ak konamgei ak kwondanyi; ak koek ichek borto agenge. 25 Ak kitebyei tuwai ach ngor, chichoto ak kwondanyi, ak kimagolilandos.

3 Ki ng'olindet ndaret kosiir tiony age tugul ne bo ng'ony ne kigagoyai Jehovah Kiptaiyat. Kilenji anyun kwondo, Tos, iman kimwa Kiptaiyat kole, Amat oam logoek che bo ketit age tugul ne bo mbaret? 2 kolenji kwondo ndaret, Kichamwech keam logoek che bo ketikab mbaret: 3 Ago kimwa Kiptaiyat kole, Amat oam logoek che bo ketit ne mi kwenutab mbaret, amat otwa, si mobegu. 4 Kolenji ndaret kwondo, Iman, mobegu: 5 Amu ingen Kiptaiyat kole, eng' betut ne koam che bo ketoto koyotogis konyekwok, ak ogergeitu ak Kiptaiyat, onai ne mie ak ne ya. 6 Ak ye kingogeer kwondo kole mie ketoto eng' amet, ak ko kararan eng' konyek, ak ko ketit ne kichamei ne ing'omiti chi, kobut anyun logoekyik koam; ak kogochi manong'otiondennyi ne kimi tuwai koam agine. 7 Koyotogis anyun konyekwak ichek tuwai, ak konai kole mi ach ngor; konabanab anyun sogekab mogoiywet, konapchigei ngoroik che kigermenegai. 8 Ak kigas cheetab Jehovah Kiptaiyat kowendoti eng' mbar ye kigagogaititit koskoleny; koug'gei koistoegei ole mi Jehovah Kiptaiyat chichoto ak kwondanyi, eng' ketik orit che mi mbar.

9 Koguur anyun Jehovah Kiptaiyat chichoto, kolenji, Imi ano? 10 Kowolji inendet, kolenji, Kagas kuting'ung' eng' mbar, ak kaiywei, amu ami ach ngor, kaung'gei anyun amu noto. 11 Ak komwa kole, Ng'o ne kamwaun kole, Imi ach ngor? Keam che bo ketoto kiang'atin ale amat iam? 12 Kolenji chito, Kwondo ne

kiigona ketebi tuwai, inendet ne kagona che bo ketit, ak kaam. 13 Kolenji Jehovah Kiptaiyat kwondo, Nee ni keyai? Kole kwondo, Keberbera ndaret ak kaam. 14 Kolenji Jehovah Kiptaiyat ndaret, Amu kaiyai kii, kagichubin keistaenen tuga tugul, ak tiony age tugul ne bo ng'ony; ichutegei moeng'ung', ak iame ng'ung'unyek betusieguk tugul kote isobe; 15 ak ande bunyondit kwenung'wong' inye ndaret ak kwondo; ak kwenutab iyoteng'ung' ak nenyi; ak kotui meting'ung', ak iguoten aginye kwariannyi. 16 Kolenji kwondo anyun, Atesun mising' nyalildang'ung' eng' manageng'ung'; isiche lagok eng' ng'wonindo; ak inyali manong'otiondeng'ung' eng' mageng'ung', ak koboun. 17 Kolenji anyun Adam, Amu kegas ng'alekab kwondang'ung', ak kiam che bo ketit ne kiang'atin, ale, Amat iam che bo ketoto; kagichub ng'ony agobo inye; iame che bo ng'ony eng' nyalilda betusieguk tugul, kote isobe; 18 iiun ng'ony katok ak katablelinik; ak iame ngwek alak tugul che bo emet; 19 ak iame amitwogik eng' kaotik che bo togeng'ung', kot iweekyigei ng'ony; amu kiginemunenen noto; amu i ng'ung'unyek, ak iweekyigei ng'ung'unyek. 20 Ak kiguure Adam kwondanyi Awa; amu inendet kametab tugul che soptos. 21 Ak kinapchi Jehovah Kiptaiyat Adam ak kwondanyi sumotik, ak kolokyi.

22 Ak kimwa Jehovah Kiptaiyat kole, Ogeero; kagogergeit chichi ak age eng' achek, ne ingen ne mie ak ne ya; ak nguno anyun, ko si mata koyogoito eunnyi, ak kobut kogeny che bo ketitab sobondo, ak koam, ak kosob koigeny: 23 Eng' noto anyun, kiimaanda Jehovah Kiptaiyat inendet eng' mbaretab Eden, si kobiit kobat ng'ony ole kiginemune. 24 Kion anyun chichoto komanda, ak konde Kerubi kotebe komostab kong'asis ne bo mbaretab Eden, ak rotwetab chok ne ilyeli ne tokyingei komosi ak komosi, koribe oret ne wendi oldab ketitab sobondo.